



16. oktober 2013

Inatsisartut Suleriaasianni § 37 naapertorlugu Naalakkersuisunut apeqqutit imaattut matumuuna saqqummiuppakka:

Sinerissamut qanittumi Sisimiuni, Nuummi Paamiunilu assagiarsuttassiissutit qaffanneqarnerat pillugu Naalakkersuisunut apeqqutit:

1. Sisimiuni sinerissamut qanittumi assagiarsuttassiissutit qaffanneqannginnissaannut ilisimatuut innersuussuteqarnerannut tusaanngitsuusaarnertik Naalakkersuisut sunik iluaqutissarsivigissallugu naatsorsuutigaat?

2. Naalakkersuisut neriorsuutigisinnaanerlugu Sisimiuni sinerissamut qanittumi assagiarsuttassiissutinik qaffaaneq assagiaqassutsimut akornutaanavianngitsoq?

3. Nuummi Paamiunilu assagiarsuttassiissutit qaffannissaannut Pinngortitaleriffiup innersuussutaa qanormita ippa?

(Inatsisartunut ilaasortaq Jens B. Frederiksen, Demokraatit)

Tunuliaqutaa

Naalakkersuisut ulloq 10. oktober aalajangerput ingerlatsivinni Sisimiuni, Nuummi Paamiunilu sinerissamut qanittumi assagiarsuttassiissutinik qaffaaniarlutik. Taama nalunaarpoq Aalisarnermut, Piniarnermut Nunalerinermullu Naalakkersuisoqarfik ulloq 11. oktober.

Tusagassiutinut nalunaarummi atuarneqarsinnaavoq, Sisimiuni assigiarsuttassiissutit qaffanneqarnissaannut Pinngortitaleriffik mianersoqqussuteqarsimasoq, tamaani assigiaqassuseq ulorianartorsiortinneqarmat. Paarlattuanik tusagassiutinut nalunaarummi oqaatigineqanngilaq Nuummi Paamiunilu assigiarsuttasiittutit qaffannissaannut Pinngortitaleriffik qanoq innersuussuteqarsimanersoq.

Demokraatini ernummatigaarput, Naalakkersuisut ilisimatuut innersuussutaannut tusaanngitsuusaarsimasinnaanerat qulakkeerumaannarlugu inuiaqatigiini inuit aalajangersimasut piffissap sivikitsuinnaaq ingerlanerani iluanaaruteqarnissaat. Isumaqarpugut nunatta soqutigisarisariaqaraa pisuussutitta uumassusillit illersorneqarnissaat asuli iluanaaruteqapallanniartunut tunniussuunnagit. Taamatummi piffissap sivikitsuinnaap ingerlanerani iluanaaruteqarnerup imaassinnaavoq peqassuseq annertuumik innarleraat.

Apeqqutit akeqquneqarput tiguseraniit ullut sulliviit naliginnaasut qulit qaangiutsinnagit.